

欽定四庫全書

子部

赤水元珠卷一



北京中醫藥大學圖書館版權所有

詳校官太醫院醫官臣姜晟

編修臣倉聖脈覆勘

欽定四庫全書

子部五

赤水元珠

醫家類

提要

臣等謹案赤水元珠三十卷明孫一奎撰一奎字文垣號東宿又號生生子休寧人是編分門七十每門又各條分縷析如風門則有傷風真中風類中風瘖痺之別寒門則有中寒惡寒之殊大旨專以明証為主故于寒熱

虛實表裏氣血八者諄諄致意其辨古今病
証名稱相混之處尤為明析惟第十卷怯損
勞瘵門附方外還丹專講運氣補液之法殊
非岐黃正道蓋一奎以醫術遊公卿間不免
以是投其所好遂為全書之大瑕是足惜耳
原本卷末附醫旨緒餘二卷醫案五卷今別
自為帙焦氏經籍志載孫一奎赤水元珠十
卷醫旨緒餘二卷而不及醫案或所見非全

本歟乾隆四十四年十一月恭校上

總纂官臣紀昀臣陸錫熊臣孫士毅

總校官臣陸費墀

赤水元珠原序

蓋謂三五之道非人不傳而非人之至者尤不得其傳
是故太上聖人知陰陽之機察寒暑之候辯愚民之冷
燠定卉物之溫涼為之濟人者不勞而受沉痾者得效
矣嗟乎世道賴此人也久矣吾心思若人亦久矣時休
陽孫生探天地五行之奧採百家同異之龜觀易必尋
易之源講書必求書之要凡所以濟人利命者一以心
學為本誠所稱上古之胎醫中之伯者生平不妄交與

在家惟註方言有醫旨緒餘數百言率皆辨衆論以歸
於中明先天太極之圖發前賢証候之秘又於先世所
未名之疾未有之方為之補其闕而增其所未盡其有
功於人夫豈負薪之勞壺殮之賜哉書成請題於余余
曰文以載道文而無道焉以宰之吾人所羞稱也今生
之所纂者率皆闡幽發微會通之中而得其解昔黃帝求
道多方索之不得而象罔得之於赤水若生所註信有
本矣名之曰赤水元珠不亦宜乎然則世之藝何捨鈞

天大樂而審笙歌薄大鬻之味而嚼草根乎雖然語云
莫前弗開莫後弗傳而為生之廼肩廼孫者又當敬承
大志永保於無疆之休可也其若生之意否孫生叩首
曰善遂書之孫生休人名一奎字文垣東宿乃其號也
羅浮道人題

凡例

一是書專以明証為主蓋醫難於認証不難於用藥凡
証不拘大小輕重俱有寒熱虛實表裏氣血八箇字
苟能於此八箇字認得真切豈必無古方可循即於
十二經藥性中表裡寒熱溫涼間摘出治之自然權
變合宜不失勝算故古謂審証猶審敵知己知彼百
戰百勝矣

一所引諸書名及諸家姓氏者欲人知所有自且一証

之中經書多有發之未盡者前賢或觸目感悟揭而補之俾後學得以宗倣後之人不究前人盡心用意處反謂某長於此而短於彼某善於補而不善於攻廼以補其缺略者反指以為偏駁豈知本之學哉且又不贅師訪友局守一家之說濫稱專門焉能擴充愚故不揣管陋每於一症之間有經文可據者即以經文為首引無經文者采取各家之言為証是則宗之非則黜之間有誤後人惑來世者則

援撫格言輿論以折其衷庶見前人補缺之意匪偏而後之取法者得以履其正也

一辨証原經文有單立篇目則原依其篇目有混稱未析者或古今名稱不同如古經以風寒濕三氣雜至而成痺立名丹溪廼改痺為痛風又如腸澼泄利腸風臟毒混論而未析如此者甚多設不辨而正之何所適從茲以各証經文混論者列之於前以為之綱以今人嘗稱者析之於後而為之目目下各列治法

庶古今照貫攻治不紊緩急檢閱免致疑滯

一婦人臟腑經絡七情六氣感病與男子無以異治法亦然所異惟胞門子戶月汛胎產陰挺崩漏赤白帶內外吹俞茲特標婦人門五卷使知同異端緒大方經畧庶家技不得稱擅場局夫不得呼專秘隨俗為變醫之能事斯無愧於扁鵲也與

一治小兒法惟臍風覘乳盤腸內弔驚疳痘疹為差別餘皆與大方脉同但臟腑脆薄劑宜較小俞三歲內

者不形於診然虎口三關之紋亦難盡憑當於聲色
動靜哭笑大小便叅之四歲後便可以一指按於經
渠列缺之上診左右手脉孰大孰小孰浮孰沉以辨
內外二傷卒多應驗不可謂全不關於診也至如痘
疹尤小兒緊要方術及外科并列門後以統其治用
寓無可無不可之意云

一採用經史國典羣書諸雜家言統計二百六十五
種非徒騁博洽資口吻也以為不廣搜遠引不足發明

天人合一之旨與聖賢立功立命之意夫古之人有不為良相愿為良醫也者此何以故子輿氏曰老吾老以及人之老幼吾幼以及人之幼然則惠溥當時澤流後世是惟相與醫迺克踐之矣

一醫家著輯汗牛充棟不能一一購置但取其書可宗法萬世無弊者一部中採數條一門中採數法數方以為嚆矢要之緣辭契意神而明之存乎其人而已况登彼岝者航筏尚可棄乎

一醫寄生死之關非知性命者不足與有言也儒之窮理盡性以至於命固當取以折衷而老氏性命兼修釋氏明心見性道理自可參觀故兼採二氏為翼夫知三教之所以者于醫學思過半矣

一醫要先識人身內景臟腑形質手足經上下宗氣營氣衛氣呼吸出納三焦終始及各經表裏陰陽金木水火土部位配合命名之義上下不得錯綜一經不得兩配與河洛周易靈素洪範黃庭性理諸家合一